

明。王。沂。撰

明。嘉。慶。刊。本

續文獻通考(言)

文海出版社有限公司印行

明·王 圻撰

明·萬曆刊本

續文獻通考(廿四)

文海出版社有限公司印行

中華民國六十八年二月出版

續文獻通考

精裝：二十四冊

定價：新台幣八千元正

纂輯者：明·王 圻

發行人：李 振 華

臺北縣永和鎮中興街99巷8號

出版者：文海出版社有限公司

郵政劃撥戶第二七八四號

電話：九二一六五九
三四一六九二八號

印刷者：東南印製廠有限公司

台北市西園路294巷15弄17號

經銷者：全省各大書局

行政院新聞局出版事業登記證局版台業字第〇四四九號

續文獻通考卷之二百四十四

皇明進士雲間王圻纂輯

仙釋考 釋家總紀壹

周昭王二十有二年釋氏生於西域

漢武帝元狩中遣嫖姚將軍霍去病討匈奴至罽蘭過居延昆邪王將其衆五萬來降獲其金人帝以爲大神列於甘泉宮金人率長丈餘不祭祀但燒香禮拜而已此佛道流通之漸也

孝哀帝元壽元年博士弟子景憲受大月氏王使伊存口授浮屠經中土聞之未之信此佛書入中國之始也

東漢明帝永平八年西域浮屠法始入中國初帝夢金人

頂有日光飛步殿庭乃訪群臣傅毅對曰臣聞天竺有道者號曰佛輕舉能飛身有日光殆其神也於是遣羽林將軍王遵中郎蔡愔之天竺求其道得其書及沙門以來其書大抵以虛無爲宗貴慈悲不殺以爲人死精神不滅隨復受形生時所行善惡皆有報應故所貴修練精神以至爲佛善爲宏闊勝大之言以勸誘愚俗精於其道者號曰沙門帝令畫工圖佛像置清涼臺及顯節陵上經緘於蘭臺石室以經用白馬負至立白馬寺於洛城雍關西於是中國始傳其術及拜跪之法而王公貴人獨楚王英最先好之

胡氏曰顯宗果明帝王之道固不遣使求之就使已至

必能鑒是非邪正之辨焚其書歸其人逆閉其途以防
其爲天下後世之禍也佛之道曰直指人心見性成佛
夫人之所以異乎禽獸者謂有夫婦父子君臣也敢問
三者性耶非性耶若以爲非性則佛固人耳不能舍是
三者而有已也以爲性耶何乃立教使天下之人去此
三者以爲生也且自侈其廣大慈悲無與對者故毒如
蛇虎微如蚊虻皆所矜憫割肉捐身以啖之無所顧恤
誠亦廣矣大矣慈悲矣而獨於夫婦君臣父子則必斷
棄之除舍之不得與蛇虎蚊虻爲比則所稱慈悲廣大
又安在哉

丘濬曰天地之區域中國爲正天地之生人中華爲正

中華之人必有配偶親屬產業衣冠人而無此數者則非人矣是故人必有偶也自是乃有無偶之人首必有髮也自是乃有無髮之首家必有業也自是乃有無業之家書必同文也自是乃有不同之文衣必有袖也自是乃有獨袖之衣有父則有子自是乃有不父之子蒞子所謂不可解者於是乎解矣有君則有臣自是乃有不君之臣蒞周所爲無所逃者於是乎逃矣教之大者孔子也自是乃有並孔子之教神之尊者上帝也自是乃有上於上帝之神孔子曰五刑之屬三千而罪莫大於不孝要君者無上非聖者無法非孝者無親浮屠氏真大亂之道而三代聖王所必誅者也明帝爲人之子

乃崇無父之教居君之位乃容不拜之臣爲中國之主
乃黨外夷之人開茲大釁以爲中國千萬年之禍春秋
之法推見至隱必誅黨惡之人必原開端之始嗚呼明
帝之罪上通乎天矣

章帝時楚王英遣郎中令奉黃縑白紵三十匹詣國相以
贖愆詔報曰楚王尚浮屠之仁慈潔齋三月與神爲誓
何嫌何疑而有悔吝其還贖以助伊蒲塞桑門之盛饌
因班示諸國

桓帝時襄楷舉浮屠不三宿桑下以諫欲帝少嗜慾去奢
泰也時帝設華盖以祠浮屠 西僧安世高至洛

靈帝時西僧竺佛朔至洛

獻帝時陶謙以笮融爲下邳使相督廣陵下邳彭城糧運
融遂斷以自入大起浮屠祠課人讀佛經招致旁郡好
佛者五千餘戶每浴佛設食布席數十里費以巨億計
魏明帝嘗欲壞宮西佛圖外國沙門以金盤盛水置於殿
前以佛舍利投於水有五色光起帝嘆曰靈異乃爾乎
遂徙於道作周閣百間佛圖故處鑿爲濛汜池種芙蓉
後天竺沙門曇柯迦羅入洛宣譯戒律爲中國戒律之
始

吳主皓嘗詔毀神祠及佛宇

晉成帝時彭城王紘上言樂賢堂有先帝手畫佛像經歷
寇難而此堂猶存宜勅作頌帝下其議蔡謨曰佛者夷

狄之俗非經典之制先帝量同天地多才多藝聊因臨御而畫此像至於雅好佛道所未聞也盜賊奔突王都隳敗而此堂塊然獨存斯誠神靈保祚之徵然未是大晉盛德之形容歌頌之所先也人臣覩物興義私作頌賦可也今欲發王命勅史官上稱先帝好佛之志下爲夷狄作一像之頌於義有疑焉於是遂寢

簡文帝爲會稽王時好談名理支道林許詢諸人嘗在齋頭支爲法師許爲都講支通一義四坐皆厭心許送一難衆人皆忭舞及卽帝位有星變詔僧法曠禳之

孝武大元六年正月帝初奉佛法立精舍於殿內引諸沙門居之右丞王雅諫不從

尹氏曰佛西域神也無論有無姑就本法言之清虛寂
滅者也內殿何地中乃立精舍又雜引沙門居之哉

帝崇尚浮屠窮奢極費所親昵者皆姘姆僧尼右衛將
軍許營上疏曰佛者清遠玄虛之神今僧尼於五戒粗
法尚不能遵而流俗競加敬事以致侵漁百姓取財爲
惠亦未合布施之道也疏奏不省

恭帝深信浮屠鑄丈六金像親迎於瓦官寺步從十許里
太原王恭篤信佛道調殺百姓修營佛寺務在壯麗士
庶嗟怨後以反誅臨刑猶誦佛經

廬江何充性好釋典崇修佛寺供給沙門靡費巨億而
不吝至親友貧乏無所施遺阮裕嘗戲曰卿志大宇宙

勇邁終古充問故阮曰我圖數千戶郡尚未能得卿圖
作佛不亦大乎時希情及弟曇奉天師道而充與弟準
崇信釋氏謝萬譏云二却詣於道二何佞於佛

瑯琊王珉王珣幼有沙門提婆爲之講毗曇經未半珉
云已解即與法綱數人自講綱曰大心皆是小未精耳
汝南周嵩精於事佛臨刑猶於市誦經

殷浩被廢東陽始看佛經初視維摩詰僧肇註曰維摩

益法身之大士見居此土以弘道者也疑般若波羅密太多後見小品恨

此語少波羅蜜華言到彼岸也經云到者有六一曰檀

尸羅精進也五曰禪定也大曰般若智慧也五者爲舟

般若爲導導則俱絕有相之流升無相之彼岸也故曰
波羅密也

宋文帝元嘉十二年丹陽尹蕭摹之奏曰佛化被於中國已歷四代形像塔寺所在千數而自頃以來不以精誠爲至更以奢競爲重舊宇頽弛曾莫之修各務造新以相誇尚甲第顯宅於茲殆盡材竹銅絲糜損無極無關神祇有累人事請自今以後有欲鑄銅像者悉詣臺自聞興造塔寺精舍皆先列言須許報然後就功詔可又沙汰沙門罷道者數百人是年以沙門彥琮爲翻經館學士時宋主以治城寺僧慧琳善談論因與議朝廷大事遂參權要賓客輻湊門車常有數十兩四方賂賂相繼勢傾一時方筵七八座上恒滿琳着高屐披貂裘置通呈書佐權侔宰輔會稽孔穎嘗詣之遇賓客填

咽膾涼而已。穎因慨然曰：遂有黑衣宰相，可謂冠履失所。時慧嚴、慧議道人住東安寺，爲道俗所推。又闡場寺多禪師，都下爲之語曰：闡場禪師窟，東安談義林。慧琳有才章，兼內外之學，嘗著均善論，頗貶裁生法，其畧云：有白學先生以爲中國聖人經綸百世，其德弘矣。智周萬變，天人之理盡矣。道無隱旨，教罔遺筌。聰睿迴哲，何負於殊論哉！有黑學道士，陋之謂不照幽冥之塗，弗及來生之化。雖尚虛心，未能虛事。不逮西域之深也。且周孔爲教止及一世，不見來生無窮之緣。積善不過子孫之慶，累惡不過餘殃之罰。報效止於榮祿，誅責極於窮賤。視聽之外，冥然不知釋迦開無窮之業，拔重關之

險陶方寸之慮宇宙不足盈其明設一慈之救群生不足勝其化叙地獄則民懼其罪敷天堂則物歡其福指泥洹以長歸乘法身以遐覽神變無不周靈澤靡不覃白學以爲要天堂以就善曷若服義而蹈道懼地獄以勅身孰與從理以端心禮拜以求免罪不由祇肅之意施一以徼百倍弗乘無恡之情羨泥洹之樂生耽逸之慮贊法身之妙肇好奇之心近欲未迷遠利又興雖言菩薩無欲群生固已有欲矣甫救交敝之民未開利競之俗澄神反道其可得乎客主酬答反復不已後其歸以爲六度與五教並行信順與慈悲齊立論行僧徒以貶黜釋氏欲加擯斥文帝見而賞之又江夏王義恭

就宋主求一學義沙門比沙門求見發遣宋主謂曰張
敷應西當令相載及敷辭上曰撫軍須一意懷道人卿
可以後編載之道中可得言晤敷不奉旨曰臣不耐雜
宋主不悅 二十六年魏拓跋燾南侵陳頴遂圖汝南
懸瓠城多作高樓施弩以射城內毀佛浮屠取金像以
爲大鈎施之衝車端以牽樓堞城內有一沙門頗有機
思輒設竒以應之

世祖孝武孝建初普責百官讜言周明因上言釋氏流教
其來有源然習慧者日贊其脩東誠者月繁其過遂至
糜散金帛侈飾車從或寄夫託妻或殺子乞兒而猶倚
靈假像背親傲君是乃外刑之所不容戮內教之所不

悔罪今宜申嚴佛律禪重國令其有疵惡顯著者悉皆
遣除 大明初張淹爲東陽太守嘗逼吏燒臂照佛民
有罪使禮佛動至數千拜因免官禁錮 二年有曇標
道人與羌人高闡謀反因是下詔所在精加沙汰後有
違犯嚴其誅坐於是設諸條禁自非戒行精童並使還
俗而諸寺尼出入宮掖交關妃后此制竟不能行 時
外國沙門摩訶衍苦節有精理於都下出新經勝鬘經
尤見重釋學 六年孝武使有司奏沙門接見皆盡敬
先是晉世庾冰始創義欲使沙門敬王者後桓玄復述
其義並不果行至是使有司奏曰儒法枝派名墨條分
至於崇親嚴上厥繇靡爽惟浮屠爲教凌越典度偃居